

Na osnovu Zaključka Državne regulatorne komisije za električnu energiju, broj: 05-28-2-318-16/15 od 14. decembra 2015. godine, Sekretar u Državnoj regulatornoj komisiji za električnu energiju utvrdio je Prečišćeni tekst Pravilnika o licencama.

Prečišćeni tekst Pravilnika o licencama obuhvata Pravilnik o licencama ("Službeni glasnik BiH", broj 87/12) i Pravilnik o izmjenama i dopunama Pravilnika o licencama ("Službeni glasnik BiH", broj 98/15), a u kojima je naznačen dan njihovog stupanja na snagu.

PRAVILNIK O LICENCAMA

(Prečišćeni tekst)

I OPĆE ODREDBE

Član 1.

(Predmet)

- (1) Ovim pravilnikom se definiraju postupak i kriteriji za izdavanje licenci od strane DERK-a, uključujući postupak podnošenja zahtjeva, pregleda zahtjeva i izdavanja licenci, kao i suštinske kriterije za odobravanje ili odbijanje zahtjeva za dodjelu licence i sadržaj i uvjete licence.
- (2) Pravilnikom se definira i način izmjene, suspenzije i ukidanja licence, kao i postupci kod prodaje, dodjeljivanja, iznajmljivanja ili prijenosa licence na neki drugi način.
- (3) Postupak izdavanja licence je javan i vodi se u skladu sa objektivnim i javnosti poznatim kriterijima na nediskriminirajući i transparentan način.

Član 2.

(Definicije)

Definicije i skraćenice koje se koriste u ovom pravilniku, uključujući i one iz Zakona i Poslovnika o radu DERK-a su sljedeće:

'Zakon' označava Zakon o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11),

'Zakon o osnivanju Elektroprijenosa' označava Zakon o osnivanju Kompanije za prijenos električne energije u Bosni i Hercegovini ("Službeni glasnik BiH", br. 35/04 i 76/09),

'Zakon o osnivanju NOS-a' označava Zakon o osnivanju Nezavisnog operatora sistema za prijenosni sistem u Bosni i Hercegovini ("Službeni glasnik BiH", broj 35/04),

'Pravilnik o javnim raspravama' označava pravilnik DERK-a po komu se vode javne rasprave,

'DERK' označava Državnu regulatornu komisiju za električnu energiju,

'FERK' označava Regulatornu komisiju za energiju u Federaciji Bosne i Hercegovine,

'RERS' označava Regulatornu komisiju za energetiku Republike Srpske,

'NOS' označava Nezavisnog operatora sistema za upravljanje radom prijenosnog sistema u Bosni i Hercegovini,

- ‘Prijenos’** označava transport električne energije preko visokonaponskog povezanog sistema za isporuku krajnjim korisnicima, distribucijama i susjednim elektroenergetskim sistemima,
- ‘Distribucija’** označava prenošenje električne energije kroz distributivne sisteme srednjeg i niskog napona s ciljem njene isporuke kupcima,
- ‘Proizvodnja’** označava proizvodnju električne energije u hidroelektranama, termoelektranama i drugim elektranama koje su priključene na prijenosnu ili distributivnu mrežu, kao i proizvodnju za vlastite potrebe,
- ‘Snabdijevanje’** označava isporuku i/ili prodaju električne energije kupcima,
- ‘Trgovina’** označava kupovinu i prodaju električne energije,
- ‘Međunarodna trgovina’** označava kupovinu, prodaju ili isporuku električne energije gdje je jedno od mjesta kupovine, prodaje ili isporuke van Bosne i Hercegovine,
- ‘Obaveza javne usluge’** označava obavezu energetske subjekata da određene energetske djelatnosti obavljaju kao javnu uslugu dostupnu svim kupcima na određenom području uz ispunjavanje određenih standarda koji se mogu odnositi na sigurnost, kontinuitet i kvalitet snabdijevanja, cijene isporuke, zaštitu okoline, uključujući energetska efikasnost, proizvodnju iz obnovljivih izvora i klimatske promjene,
- ‘Javna rasprava’** označava bilo koju raspravu organiziranu od DERK-a, otvorenu za prisustvo javnosti, a koja može biti opća, formalna ili tehnička rasprava,
- ‘Licenca’** označava dokument izdat od DERK-a koji licu kome je izdata daje ovlaštenje da obavlja djelatnost navedenu u licenci pod uvjetima propisanim uvjetima za korištenje licence,
- ‘Vlasnik licence’** označava lice koje posjeduje najmanje jednu od licenci definiranih u članu 4. ovog pravilnika,
- ‘Lice’** označava fizičko ili pravno lice bilo kojeg oblika svojine i organiziranja,
- ‘Podnosilac zahtjeva’** označava lice koje podnosi zahtjev za izdavanje licence u skladu sa ovim pravilnikom i Zakonom,
- ‘Trgovac’** označava pravno lice koje se bavi trgovinom električne energije,
- ‘Snabdjevač’** označava pravno lice koje se bavi snabdijevanjem,
- ‘Dozvola za izgradnju’** označava akt koji izdaje DERK, a kojim se pravnom ili fizičkom licu dozvoljava izgradnja novog elektroenergetskog objekta ili značajna rekonstrukcija postojećeg elektroenergetskog objekta za proizvodnju električne energije na području Brčko Distrikta BiH, i
- ‘Značajna rekonstrukcija’** označava rekonstrukciju elektroenergetskog objekta za proizvodnju električne energije kojom se mijenja snaga tog objekta.

Član 3.

(Licenciranje)

- (1) Odgovarajuću licencu izdatu od DERK-a u skladu sa zakonom i ovim Pravilnikom mora posjedovati pravno ili fizičko lice koje obavlja djelatnost prijenosa električne energije, nezavisnog operatora sistema, međunarodne trgovine električnom energijom, kao i pravno ili fizičko lice sa sjedištem u Brčko Distriktu BiH za obavljanje djelatnosti distribucije, javnog snabdijevanja kupaca električnom energijom i trgovine i snabdijevanja električnom energijom na teritoriji BiH, te pravno ili fizičko lice koje ima

proizvodni kapacitet u Brčko Distriktu BiH za djelatnost proizvodnje električne energije.

- (2) Na području Brčko Distrikta BiH djelatnosti trgovine i snabdijevanja električnom energijom može obavljati i pravno ili fizičko lice koje posjeduje odgovarajuću licencu izdatu od RERS-a ili FERK-a, u skladu sa njihovim nadležnostima.
- (3) Licenca za trgovinu i snabdijevanje električnom energijom na teritoriji BiH izdata od DERK-a licu sa sjedištem u Brčko Distriktu BiH važi na teritoriji BiH.
- (4) Pravno ili fizičko lice dužno je da pribavi dozvolu za izgradnju elektroenergetskog objekta od DERK-a prije početka izgradnje ili značajne rekonstrukcije elektroenergetskog objekta za proizvodnju električne energije na području Brčko Distrikta BiH.
- (5) DERK će razmotriti zahtjev za izdavanje licence u skladu sa kriterijima navedenim u Zakonu i ovom pravilniku. U tumačenju ovih kriterija, DERK će djelovati u pravcu stvaranja uvjeta za neograničenu i slobodnu trgovinu i kontinuirano snabdijevanje električnom energijom po definiranom standardu kvaliteta za dobrobit građana BiH, i kreiranja tržišta električne energije.
- (6) Podnosilac zahtjeva za izdavanje licence ima obavezu da dokaže da ispunjava sve kriterije za izdavanje licence i da poštuje sve uvjete licence.
- (7) DERK će u licencu uključiti sve uvjete koji su neophodni za osiguranje ciljeva Zakona, ovog pravilnika i drugih dokumenata DERK-a.

Član 4.

(Vrste licenci)

- (1) DERK iz svoje nadležnosti izdaje sljedeće licence:
 - a) Licenca za prijenos električne energije,
 - b) Licenca za aktivnosti nezavisnog operatora sistema, i
 - c) Licenca za međunarodnu trgovinu.
- (2) Pored licenci iz stava (1) ovog člana, u skladu sa svojim nadležnostima u pogledu Brčko Distrikta BiH DERK izdaje i sljedeće licence, odnosno dozvole:
 - a) Licenca za trgovinu i snabdijevanje električnom energijom na teritoriji BiH,
 - b) Licenca za distribuciju električne energije,
 - c) Licenca za proizvodnju električne energije za objekte instalirane snage preko 1 MW, i
 - d) Dozvola za izgradnju elektroenergetskog objekta instalirane snage preko 1 MW.

Član 5.

(Period važenja licenci)

- (1) Licenca se izdaje na određeni vremenski period, ne kraći od pet i ne duži od 40 godina.
- (2) Podnosilac zahtjeva u svom zahtjevu može da navede za koji vremenski period traži licencu.
- (3) O periodu na koji se licenca izdaje odlučuje DERK, a prilikom odlučivanja o vremenu trajanja licence, pored izražene želje podnosioca zahtjeva, koristit će se i sljedećim, ali ne i obavezujućim, normama:

- a) licenca za prijenos električne energije 25 godina,
 - b) licenca za aktivnosti nezavisnog operatora sistema sedam godina,
 - c) licenca za međunarodnu trgovinu električnom energijom pet godina,
 - d) licenca za trgovinu i snabdijevanje električnom energijom na teritoriji BiH pet godina,
 - e) licenca za distribuciju električne energije 25 godina, ali ne duže od 30 godina,
 - f) licenca za proizvodnju električne energije 25 godina, ali ne duže od 30 godina, i
 - g) dozvola za izgradnju elektroenergetskog objekta šest godina.
- (4) Prilikom odlučivanja o zahtjevu za izdavanje licence koji je prvi put podnesen DERK-u ili prilikom izdavanja licence za proizvodnju dok se proizvodni objekat nalazi u probnom radu, kao i u drugim opravdanim slučajevima, DERK može izdati privremenu licencu na period do dvije godine.
- (5) DERK može u uvjete licence (dozvole) uključiti i uvjete koji mu omogućavaju da produži period važenja licence i da naloži vlasniku licence da, uprkos isticanju licence, nastavi pružati kompenzirane usluge na privremenom osnovu, ako se za to pojavi potreba.
- (6) Dozvola za izgradnju elektroenergetskog objekta prestaje da važi ukoliko građenje ili radovi nisu započeti u roku određenom u dozvoli.
- (7) Rok iz stava (6) ovog člana ne može biti kraći od šest mjeseci niti duži od dvije godine.

II POSTUPAK PODNOŠENJA ZAHTJEVA ZA IZDAVANJE LICENCE

Član 6.

(Podnosilac zahtjeva)

Podnosilac zahtjeva za izdavanje licence može biti:

- a) za licencu za prijenos električne energije – “Elektroprijenos Bosne i Hercegovine” uspostavljen na osnovu Zakona o prijenosu, regulatoru i operatoru sistema električne energije u Bosni i Hercegovini i Zakona o osnivanju Kompanije za prijenos električne energije u Bosni i Hercegovini,
- b) za licencu za aktivnosti nezavisnog operatora sistema - “Nezavisni operator sistema u Bosni i Hercegovini” uspostavljen na osnovu Zakona o prijenosu, regulatoru i operatoru sistema električne energije u Bosni i Hercegovini i Zakona o osnivanju Nezavisnog operatora sistema za prijenosni sistem u Bosni i Hercegovini,
- c) za licencu za međunarodnu trgovinu - sva lica registrirana za obavljanje poslova trgovine električnom energijom, ako ispunjavaju uvjete za bavljenje međunarodnom trgovinom predviđene zakonom i ovim pravilnikom,
- d) za licencu za trgovinu i snabdijevanje električnom energijom na teritoriji BiH - lica sa sjedištem u Brčko Distriktu BiH koja se bave proizvodnjom električne energije ili koja se bave trgovinom električne energije,
- e) za licencu za distribuciju električne energije - Javno preduzeće za komunalne djelatnosti “Komunalno Brčko” d.o.o. Brčko Distrikt BiH, i

- f) za licencu za proizvodnju električne energije - lice čiji se proizvodni objekat nalazi na području Brčko Distrikta BiH.

Član 7.

(Podnošenje zahtjeva)

- (1) Podnosilac zahtjeva dostavlja zahtjev na način, u formi i na obrascima definiranim od DERK-a.
- (2) Obrasci zahtjeva mogu se preuzeti sa internet stranice ili u sjedištu DERK-a.
- (3) Zahtjev sa priložima se podnosi u pisanoj formi, ovjeren i potpisan od podnosioca zahtjeva, a dostavlja se poštom, ličnom dostavom ili na drugi adekvatan način. Svi dokumenti iz zahtjeva se dostavljaju i u elektronskoj formi propisanoj od DERK-a. Uz zahtjev je potrebno priložiti i izjavu da dokumenti dostavljeni u elektronskoj formi u potpunosti odgovaraju dostavljenim originalima.
- (4) Podnosilac uz zahtjev prilaže dokaz o uplati naknade za podnošenje zahtjeva definirane posebnom odlukom DERK-a.
- (5) Podnosilac je obavezan potpisati izjavu o prihvatanju obaveza plaćanja regulatorne naknade, kao i izjavu datu pod punom materijalnom i krivičnom odgovornošću da su svi podaci dostavljeni DERK-u istiniti i tačni.
- (6) DERK razmatra zahtjev za licencu samo ukoliko je zahtjev kompletan i ukoliko sadrži dokaze navedene u st. (3) i (4) ovog člana.
- (7) Ako podnosilac zahtjeva namjerava da obavlja više djelatnosti za koje je potrebna licenca, dužan je za svaku djelatnost podnijeti poseban zahtjev.
- (8) Ukoliko podnosilac zahtjeva istovremeno podnese zahtjeve za izdavanje licence za trgovinu i snabdijevanje na teritoriji BiH i licence za međunarodnu trgovinu električnom energijom, DERK može voditi jedinstven postupak.

Član 8.

(Kompletnost zahtjeva)

- (1) DERK će najkasnije u roku od 30 dana od dana prijema zahtjeva utvrditi da li je zahtjev kompletan i podnesen u skladu sa odredbama ovog pravilnika.
- (2) Nakon pregleda zahtjeva, DERK dostavlja podnosiocu pisanu obavijest o tome da li je zahtjev kompletan ili je potrebna njegova dopuna.
- (3) U slučaju da zahtjev nije kompletan, DERK će, u obavijesti iz stava (2) ovog člana, navesti njegove nedostatke i odrediti rok u kojem je podnosilac zahtjeva dužan iste otkloniti.
- (4) Ukoliko podnosilac zahtjeva ne dopuni zahtjev u roku iz stava (3) ovog člana, DERK može zaključkom odbaciti njegov zahtjev kao nepotpun.
- (5) Kompletnost zahtjeva utvrđuje se zaključkom na internom sastanku DERK-a.

Član 9.

(Zahtjevi za dodatnim informacijama)

- (1) U postupku utvrđivanja činjenica o ispunjavanju uvjeta propisanih za izdavanje licence, DERK ima pravo provjeriti sve podatke, te po potrebi izvršiti pregled objekata, postrojenja i opreme, dokumentacije, kao i tražiti dodatne informacije u bilo kojem

trenutku od podnošenja zahtjeva do donošenja konačne odluke o zahtjevu, kao i u periodu važenja licence.

- (2) Podnosilac zahtjeva je dužan saradivati sa DERK-om i dostavljati podatke i informacije iz stava (1) ovog člana u rokovima koje odredi DERK.

III OBRADA ZAHTJEVA I DONOŠENJE ODLUKE

Član 10.

(Objava zahtjeva)

- (1) Po utvrđivanju kompletnosti zahtjeva, DERK objavljuje kratku obavijest za javnost u pisanim medijima i na svojoj internet stranici, sumirajući zahtjev za licencu.
- (2) Obavijest sadrži i način na koji zainteresirana lica mogu dobiti informacije, kao i upute zainteresiranim licima da mogu podnijeti pisane komentare na zahtjev za izdavanje licence.
- (3) Rok za podnošenje pisanih komentara je osam dana od dana objave obavijesti za javnost.
- (4) Obavijest za javnost sadrži i kriterije za stjecanje statusa umješača i informaciju kad i kako se mogu podnijeti zahtjevi za stjecanje umješača.

Član 11.

(Uloga i odgovornost umješača)

- (1) DERK može dodijeliti status umješača licu koje dokaže da je njegov interes u postupku izdavanja licence drugačiji od općeg javnog interesa. U određenim slučajevima, DERK može ograničiti obim učešća umješača.
- (2) U slučaju iz stava (1) ovog člana, umješaču se dozvoljava da učestvuje u postupku, izvodi dokaze i zahtijeva informacije od podnosioca zahtjeva putem DERK-a.
- (3) Pisane ili usmene izjave umješača na raspravama za izdavanje licenci daju se pod punom krivičnom i materijalnom odgovornošću za tačnost i ispravnost datih podataka.

Član 12.

(Saradnja sa drugim regulatornim komisijama)

DERK će razmjenjivati potrebne informacije sa FERK-om i RERS-om o podnesenim zahtjevima za licence i odlukama o istim, kao i pitanjima regulatornog nadzora i ispunjavanju uvjeta za korištenje licenci.

Član 13.

(Priprema nacrt licence)

- (1) Nakon postupka provjere kompletnosti zahtjeva iz člana 8. ovog pravilnika, provjerava se tačnost podataka, dokumenata ili informacija priloženih uz zahtjev.
- (2) Na osnovu obrade zahtjeva iz stava (1) ovog člana i nakon ocjene komentara javnosti na sažetak zahtjeva za licencu, na internom sastanku DERK-a utvrđuje se nacrt odluke o izdavanju licence.
- (3) Za korištenje licence za međunarodnu trgovinu DERK propisuje Standardne uvjete.
- (4) Pored Standardnih uvjeta DERK može propisati i dodatne uvjete.

- (5) Nacrt odluke o izdavanju licence upućuje se u javnu raspravu.

Član 14.

(Javna rasprava)

- (1) DERK u svakoj fazi postupka izdavanja licence može voditi javnu raspravu u skladu sa Poslovníkom o radu i Pravilníkom o javnim raspravama DERK-a.
- (2) Javnu raspravu vodi voditelj postupka, a u njegovom odsustvu lice koje odredi DERK.

Član 15.

(Formalna rasprava)

Formalna rasprava se održava samo kad je potrebno riješiti sporna pitanja u postupku izdavanja licence.

Član 16.

(Donošenje odluka)

- (1) Nakon okončanja javne rasprave, voditelj postupka priprema novi nacrt odluke o izdavanju licence.
- (2) Podnosilac zahtjeva i umješać mogu dati svoj komentar na novi nacrt odluke u roku od osam dana od dana prijema. Na javnoj raspravi na kojoj nije bilo komentara, u cilju ekonomičnosti postupka, podnosilac zahtjeva može se odreći prava na dostavljanje komentara.
- (3) Po isteku roka za prijem komentara, DERK na internom sastanku utvrđuje prijedlog odluke o izdavanju licence.
- (4) Odluka o izdavanju licence donosi se na redovnoj sjednici DERK-a.
- (5) Rok za donošenje konačne odluke o izdavanju licence zavisi od složenosti zahtjeva, pri čemu će DERK voditi računa o načelu efikasnosti.
- (6) Odluka iz stava (5) ovog pravilnika, u pravilu, stupa na snagu danom donošenja. Odluka se dostavlja podnosiocu zahtjeva i umješaću i objavljuje u skladu sa članom 56. ovog pravilnika.

Član 17.

(Regulatorna naknada)

- (1) Iznos regulatorne naknade i naknade za podnošenje zahtjeva po vrstama licenci utvrđuje se posebnom odlukom DERK-a.
- (2) Naknada za podnošenje zahtjeva se uplaćuje prije podnošenja zahtjeva za izdavanje licence.
- (3) Tokom trajanja licence, kao i u slučaju produženja licence iz stava (5) člana 5. ovog pravilnika, vlasnik licence plaća regulatornu naknadu kvartalno, unaprijed.

U slučaju neblagovremenog izmirenja obaveze plaćanja regulatorne naknade, DERK može od vlasnika licence zahtijevati dostavljanje bankarske garancije.

IV SADRŽAJ ZAHTJEVA ZA IZDAVANJE LICENCE

Član 18.

(Osnovni dokumenti)

- (1) Zahtjev za izdavanje licence se podnosi na obrascu propisanim od DERK-a, a uz zahtjev se obavezno prilažu sljedeći dokumenti:
 - a) Izvod iz nadležnog registra pravnih lica,
 - b) Potvrda ili uvjerenje o poreznoj registraciji,
 - c) Statut ili osnivački akt,
 - d) Organizacijska struktura i broj zaposlenih,
 - e) Revidirani finansijski izvještaji o završnom računu za prethodne tri godine za postojeće firme ili početni bilans stanja za novoformirane firme,
 - f) Poslovni plan za naredne tri godine,
 - g) Popis stalnih sredstava po amortizacijskim grupama i zadnji godišnji obračun amortizacije,
 - h) Uvjerenje nadležnog suda da nije pokrenut stečajni ili likvidacijski postupak nad podnosiocem zahtjeva,
 - i) Uvjerenje nadležnog suda da protiv podnosioca zahtjeva i njegovog zastupnika nije pokrenut krivični postupak,
 - j) Uvjerenje nadležnog organa da podnosiocu zahtjeva i njegovom zakonskom zastupniku ne traje izrečena mjera sigurnosti ili zaštitna mjera zabrane obavljanja poziva, djelatnosti ili dužnosti za koju se zahtijeva ili je u vezi sa izdavanjem licence,
 - k) Izjava o svim otvorenim transakcijskim računima kod komercijalnih banaka i bankarska potvrda njihovog statusa (bankarska potvrda statusa podrazumijeva obim prometa na računu u zadnjih mjesec dana kao i pokazatelje o eventualnim blokadama na računima),
 - l) Izjava o statusu usklađenosti sa svim propisima u vezi sa zaštitom okoline i provođenju istih,
 - m) Izjava da će se podnosilac zahtjeva pridržavati tržišnih pravila,
 - n) Izjava o postojećim izdatim licencama ili zahtjevima za licence podnesenim FERK-u ili RERS-u, kao i bilo kojem drugom regulatornom organu van BiH, i
 - o) Bilo koja druga informacija koju DERK smatra, u bilo kojem stepenu postupka, potrebnom za donošenje odluke.
- (2) Svi dokazi se prilažu u originalu ili u ovjerenj kopiji, s tim da potvrde i izjave ne smiju biti starije od 60 dana.

Član 19.

(Dodatni dokumenti uz zahtjev za izdavanje licence za prijenos električne energije)

Uz zahtjev za izdavanje licence za prijenos električne energije, pored dokumenata navedenih u članu 18. ovog pravilnika, obavezno se prilažu sljedeći dokumenti:

- a) Tehnički podaci o mreži i postrojenjima u vlasništvu podnosioca zahtjeva koji se koriste u svrhu obavljanja djelatnosti prijenosa električne energije sa podacima o upotrebnim dozvolama za iste,
- b) Tehnički podaci o mreži i postrojenjima koja nisu u vlasništvu podnosioca zahtjeva, a koriste se u svrhu obavljanja djelatnosti prijenosa električne energije sa detaljima o vlasništvu nad pomenutim sredstvima i pravnom osnovu korištenja,
- c) Situacijska karta i blok-funkcionalna šema prijenosne elektroenergetske mreže,
- d) Specifikacija i tehničke karakteristike mjernih uređaja na mjestima preuzimanja/isporuke električne energije,
- e) Lista komunikacijskih sredstava koja služe za obavljanje osnovne djelatnosti podnosioca zahtjeva sa naznačenim vlasništvom nad tim sredstvima,
- f) Plan izgradnje novih i značajnije rekonstrukcije postojećih objekata za naredne tri godine,
- g) Izvod ili skraćena verzija Plana održavanja elektroenergetskih objekata za naredne tri godine,
- h) Pregled kupaca direktno priključenih na prijenosnu mrežu sa potrošnjom u prethodne tri godine,
- i) Pregled održavanja objekata u prethodne tri godine,
- j) Pregled načina nadzora pripadajuće prijenosne mreže i pregled načina upravljanja određenih visokonaponskih prijenosnih uređaja od kojih se ne zahtijeva omogućavanje slobodnog protoka električne energije iz značajnih energetskih izvora preko međusobno povezane prijenosne mreže, a koje je NOS eventualno dodijelio podnosiocu zahtjeva na upravljanje,
- k) Spisak i opis funkcija softvera neophodnog za obavljanje osnovne djelatnosti kojim raspolaže podnosilac zahtjeva,
- l) Izjava o sposobnosti i spremnosti zadovoljavanja obaveza koje se odnose na javnu uslugu, i
- m) Certifikat nezavisne kuće za akreditiranje o sistemu obezbjeđenja kvaliteta ili plan i vremenski raspored aktivnosti na uvođenju takvog sistema.

Član 20.

(Dodatni dokumenti uz zahtjev za izdavanje licence za aktivnosti nezavisnog operatora sistema)

Uz zahtjev za izdavanje licence za aktivnosti nezavisnog operatora sistema, pored dokumenata navedenih u članu 18. ovog pravilnika, obavezno se prilažu sljedeći dokumenti:

- a) Metodologija i kriteriji upravljanja mrežom sa funkcionalnom šemom aktivnosti,
- b) Lista komunikacijskih sredstava koja služe za obavljanje osnovne djelatnosti podnosioca zahtjeva sa naznačenim vlasništvom nad tim sredstvima,
- c) Spisak i opis funkcija softvera neophodnog za obavljanje osnovne djelatnosti kojim raspolaže podnosilac zahtjeva,
- d) Pregled i vremenski plan donošenja tehničkih i komercijalnih pravila potrebnih za obavljanje djelatnosti nezavisnog operatora sistema,

- e) Pregled i vremenski plan potpisivanja ugovora sa drugim subjektima u BiH ili inostranstvu neophodnih za obavljanje djelatnosti nezavisnog operatora sistema,
- f) Pregled i kratak prikaz međunarodnih organizacija u kojima podnosilac zahtjeva želi ili ima obavezu da participira,
- g) Dokument o eventualno datim ovlaštenjima odgovarajućim stranama koje su uključene u aktivnosti prijenosa za upravljanje radom određenih visokonaponskih prijenosnih uređaja od kojih se ne zahtijeva omogućavanje slobodnog protoka električne energije iz značajnih energetskih izvora preko međusobno povezane prijenosne mreže,
- h) Izjava o sposobnosti i spremnosti zadovoljavanja obaveza koje se odnose na javnu uslugu, i
- i) Certifikat nezavisne kuće za akreditiranje o sistemu obezbjeđenja kvaliteta ili plan i vremenski raspored aktivnosti na uvođenju takvog sistema.

Član 21.

(Dodatni dokumenti uz zahtjev za izdavanje licence za međunarodnu trgovinu)

Uz zahtjev za izdavanje licence za međunarodnu trgovinu električnom energijom, pored dokumenta navedenih u članu 18. ovog pravilnika, obavezno se prilažu sljedeći dokumenti:

- a) Postojeća licenca za trgovinu, proizvodnju ili snabdijevanje izdata od FERK-a, RERS-a ili DERK-a, ako je podnosilac zahtjeva već učesnik na domaćem tržištu električne energije ili dokaz da je podnosilac zahtjeva zatražio izdavanje takve licence,
- b) Dokaz o solventnosti podnosioca zahtjeva,
- c) Dokaz o vlasničkom kapitalu podnosioca zahtjeva sa pregledom vlasnika ili akcionara/dioničara sa učešćem većim od 5%,
- d) Izjava poslovne banke ili druge organizacije o spremnosti da izda finansijsku garanciju ili garanciju o izvršenju na iznos planirane ili ugovorene transakcije (podobnost garanta i kvalitet garancije ocjenjuje DERK),
- e) Izjava podnosioca zahtjeva da prihvata standardizirane uvjete za korištenje licence, i
- f) Informacija podnosioca zahtjeva o tržištima električne energije van BiH na kojima posluje (ukoliko podnosilac zahtjeva obavlja i djelatnosti u inostranstvu).

Član 22.

(Dodatni dokumenti uz zahtjev za izdavanje licence za trgovinu i snabdijevanje električnom energijom na teritoriji BiH)

Uz zahtjev za izdavanje licence za trgovinu i snabdijevanje električnom energijom na teritoriji BiH, pored dokumenata navedenih u članu 18. ovog pravilnika, obavezno se prilažu sljedeći dokumenti:

- a) Dokaz o pravnom osnovu za korištenje poslovnog prostora,
- b) Opis neophodne računarske opreme za obavljanje djelatnosti, i
- c) Namjeravani godišnji obim snabdijevanja/trgovine električnom energijom.

Član 23.

(Dodatni dokumenti uz zahtjev za izdavanje licence za distribuciju električne energije)

Uz zahtjev za izdavanje licence za distribuciju električne energije, pored dokumenata navedenih u članu 18. ovog pravilnika, obavezno se prilažu sljedeći dokumenti:

- a) Lista elektroenergetskih objekata sa osnovnim tehničkim parametrima,
- b) Mapa elektroenergetske mreže,
- c) Broj i struktura korisnika distributivne mreže po naponskim nivoima i kategorijama potrošnje,
- d) Zapisnici i rješenja nadležnih inspekcija u prethodne tri godine,
- e) Tačke preuzimanja električne energije sa prijenosne mreže ili razmjene sa susjednim distributivnim područjima,
- f) Historijski pregled potrošnje distributivnog područja sa projekcijom za naredni period,
- g) Karakterističan dijagram opterećenja u tačkama preuzimanja električne energije, i
- h) Certifikat nezavisne kuće za akreditiranje o sistemu obezbjeđenja kvaliteta ili plan i vremenski raspored aktivnosti na uvođenju takvog sistema.

Član 24.

(Dodatni dokumenti uz zahtjev za izdavanje licence za proizvodnju električne energije)

Uz zahtjev za izdavanje licence za proizvodnju električne energije, pored dokumenata navedenih u članu 18. ovog pravilnika, obavezno se prilažu sljedeći dokumenti:

- a) Mapa sa prikazom lokacije postrojenja koja se koriste za proizvodnju električne energije,
- b) Ekološka dozvola,
- c) Ugovor o koncesiji ako se objekat gradi po tom principu,
- d) Ugovor o priključenju na distributivnu ili prijenosnu mrežu, i
- e) Tehnički podaci o proizvodnim jedinicama, objektu i postrojenju, kao i pravni osnov njihovog korištenja, uključujući i odobrenje za upotrebu proizvodnog objekta, odnosno odobrenje za probni rad proizvodnog objekta.

Član 25.

(Povjerljive informacije)

- (1) Strane uključene u postupak izdavanja licence čuvaju povjerljivost svih traženih podataka i informacija za koje je utvrđeno da se smatraju poslovnom tajnom ili povjerljivom informacijom, osim u mjeri u kojoj zakon predviđa da se takvi podaci objave.
- (2) DERK određuje da li povjerljive informacije, podnesene od podnosioca zahtjeva kao dio zahtjeva, trebaju biti dostupne drugim stranama.
- (3) Podaci dobijeni prilikom podnošenja zahtjeva za licencu mogu se koristiti samo u svrhu izdavanja i praćenja licence.
- (4) Svaka strana koja dobije pristup podacima ili informacijama za koje zna da su povjerljive prirode, ima obavezu da štiti povjerljivost tih podataka ili informacija, osim u slučajevima kada se prema zakonu zahtijeva dostava tih podataka ili informacija.
- (5) DERK propisuje posebnim pravilnikom pravila o postupanju sa povjerljivim informacijama.

V KRITERIJI ZA IZDAVANJE LICENCE

Član 26. (Opći kriteriji)

- (1) Opći kriteriji za donošenje odluke o izdavanju licence, u skladu Zakonom, između ostalog su bazirani na:
 - a) sigurnosti elektroprijenosne mreže, instalacija i pripadajuće opreme,
 - b) zaštiti javnog zdravstva i sigurnosti,
 - c) zaštiti okoline,
 - d) korištenju zemljišta i lokacija,
 - e) korištenju javne imovine,
 - f) energetske efikasnosti,
 - g) kriterijima koji se posebno odnose na podnosioca zahtjeva, kao što su tehničke, ekonomske i finansijske sposobnosti, i
 - h) sposobnosti i spremnosti da se zadovolje sve obaveze koje se odnose na javnu uslugu.
- (2) DERK smatra da su kriteriji iz stava (1) ovog člana, kao i drugi kriteriji ispunjeni ako podnositelj zahtjeva dokaže:
 - a) da ispunjava uvjete sigurnosti tako što predoči da svi njegovi objekti, postrojenja i aktivnosti imaju potrebne dozvole i zadovoljavaju sve primjenljive standarde,
 - b) da je priložio izjavu o usklađenosti normativnih akata sa svim propisima u vezi sa zaštitom okoline i provođenju istih, kao i da ispunjava sve uspostavljene kriterije za zaštitu okoline i vrši stalnu kontrolu nad utjecajem na okolinu,
 - c) da se javna imovina, uključujući i zemljište, koristi sa dužnom pažnjom i u obimu u kojem je izdato ovlaštenje za korištenje takve imovine i zemljišta, kao i da je podnositelj zahtjeva dokazao da posjeduje odgovarajuća prava i ovlaštenja za korištenje privatne imovine uključene u izgradnju,
 - d) da je svoje aktivnosti prilagodio svim propisima u vezi sa energetske efikasnosti,
 - e) da ispunjava sve primjenljive tehničke kriterije za objekte, postrojenja, uređaje i opremu za obavljanje djelatnosti,
 - f) da je dokazao finansijsku sposobnost i/ili osigurao odgovarajuće finansijske garancije za ispunjenje svih uvjeta za korištenje licence,
 - g) da ima dovoljno zaposlenih sa odgovarajućom stručnom kvalifikacijom za obavljanje djelatnosti,
 - h) da njegova organizacijska struktura osigurava kvalitetno izvršenje licencirane djelatnosti,
 - i) da je priložio izjavu o sposobnosti i spremnosti zadovoljavanja svih obaveza koje se odnose na javnu uslugu,
 - j) da mu nije oduzeta licenca iste vrste u posljednjih pet godina prije podnošenja zahtjeva za izdavanje licence od bilo koje regulatorne komisije,
 - k) da protiv njega nije pokrenut stečajni postupak,

- l) da protiv njega i njegovog zakonskog zastupnika nije pokrenut krivični postupak,
- m) da njemu i njegovom zastupniku ne traje izrečena mjera sigurnosti ili zaštitna mjera zabrane obavljanja poziva, djelatnosti ili dužnosti za ili u vezi sa djelatnošću za koju se zahtijeva izdavanje dozvole,
- n) da je sposoban da osigura računovodstvene izvještaje u formi i sa detaljima koje zatraži DERK, i
- o) da je spreman da se pridržava svih predloženih uvjeta licence koji će biti uključeni u licencu.

Član 27.

(Posebni kriteriji)

Pored općih kriterija za izdavanje licence iz člana 26. ovog pravilnika, podnosilac zahtjeva za određenu vrstu licence treba da zadovolji i posebne kriterije vezane za licencu za koju podnosi zahtjev.

Član 28.

(Posebni kriteriji za izdavanje licence za prijenos električne energije)

Posebni kriteriji za izdavanje licence za prijenos električne energije su:

- a) korištenje elektroenergetske mreže odgovarajućih karakteristika za siguran i pouzdan prijenos električne energije,
- b) posjedovanje i provođenje plana redovnog održavanja svojih objekata, i
- c) da je dokazana finansijska i tehnička sposobnost za demontažu i/ili uklanjanje svih objekata u skladu sa tehničkim zahtjevima okoline, nakon isteka roka važenja licence, a u slučajevima navedenim u licenci.

Član 29.

(Posebni kriteriji za izdavanje licence za obavljanje djelatnosti nezavisnog operatora sistema)

Poseban kriterij za izdavanje licence za aktivnosti nezavisnog operatora sistema je mogućnost adekvatnog vršenja funkcije nezavisnog operatora sistema u skladu sa zakonom.

Član 30.

(Posebni kriteriji za izdavanje licence za međunarodnu trgovinu električnom energijom)

Posebni kriteriji za izdavanje licence za međunarodnu trgovinu su:

- a) da je dokazana mogućnost pribavljanja odgovarajućih finansijskih garancija i garancija za izvršenje svoje poslovne djelatnosti,
- b) da je podnosilac zahtjeva dao izjavu da će se pridržavati tržišnih pravila,
- c) da je podnosilac zahtjeva dao izjavu da prihvata standardizirane uvjete za korištenje licence,
- d) da je upisan i uplaćen osnovni kapital u iznosu od najmanje jedan milion KM, i
- e) da je podnosilac zahtjeva dokazao da su ostvarene pretpostavke za izdavanje odgovarajuće licence od FERK-a ili RERS-a prije početka obavljanja djelatnosti međunarodne trgovine na osnovu licence DERK-a.

Član 31.

(Posebni kriteriji za izdavanje licence za trgovinu i snabdijevanje električnom energijom na teritoriji BiH)

Posebni kriteriji za izdavanje licence za trgovinu i snabdijevanje električnom energijom na teritoriji BiH su:

- a) da je dokazana mogućnost pribavljanja odgovarajućih finansijskih garancija i garancija za izvršenje svoje poslovne djelatnosti,
- b) da je podnosilac zahtjeva dao izjavu da će se pridržavati tržišnih pravila,
- c) da je upisan i uplaćen osnovni kapital u iznosu od najmanje jedan milion KM, i
- d) da djelatnost podnosioca zahtjeva nije vezana za djelatnost distribucije električne energije.

Član 32.

(Posebni kriteriji za izdavanje licence za distribuciju električne energije)

Posebni kriteriji za izdavanje licence za distribuciju električne energije su:

- a) da je podnosilac zahtjeva vlasnik ili savjestan posjednik distributivne mreže na području na kojem obavlja djelatnost,
- b) da ispunjava uvjete za siguran rad distributivnih objekata i postrojenja,
- c) da se pridržava svih pravila u vezi sa zaštitom životne sredine,
- d) da je vlasnik ili savjestan posjednik mjernih uređaja na svim mjestima preuzimanja i isporuke električne energije,
- e) da posjeduje adekvatne ljudske i materijalne resurse za održavanje distributivne mreže koju koristi, i
- f) da je uspostavio efikasnu i pouzdanu proceduru očitavanja mjernih uređaja i prosljeđivanja podataka o potrošnji snabdijevaču.

Član 33.

(Posebni kriteriji za izdavanje licence za proizvodnju električne energije)

Posebni kriteriji za izdavanje licence za proizvodnju električne energije su:

- a) da je podnosilac zahtjeva vlasnik ili savjestan posjednik elektrane ili postrojenja za proizvodnju električne energije,
- b) da ispunjava uvjete za siguran rad elektrane i postrojenja,
- c) da posjeduje neophodne dozvole zahtijevane ovim pravilnikom i zakonom,
- d) da je zaključio ugovor o priključenju na distributivnu ili prijenosnu mrežu, i
- e) da posjeduje odobrenje za upotrebu proizvodnog objekta ili odobrenje za probni rad proizvodnog objekta.

Član 34.

(Razlozi za odbacivanje ili odbijanje zahtjeva za licencu)

DERK će odbaciti ili odbiti zahtjev za izdavanje licence u sljedećim slučajevima:

- a) ukoliko je zahtjev nepotpun, a zahtijevani podaci nisu dostavljeni ni nakon isteka roka za dostavljanje kompletiranog zahtjeva,

- b) ukoliko je zahtjev podnesen od neovlaštenog lica,
- c) ukoliko podnosilac zahtjeva ne uspije da dokaže da ispunjava kriterije za izdavanje licence,
- d) ukoliko dostavljeni podaci o finansijskim i tehničkim kapacitetima ne predstavljaju dovoljnu garanciju da će podnosilac zahtjeva na odgovarajući način obavljati traženu djelatnost,
- e) ukoliko je podnosilac zahtjeva kažnjavan za prijevaru, finansijsku neodgovornost u krivičnom postupku ili značajno kršenje uvjeta licenci na tržištima električne energije u i van BiH,
- f) ukoliko je podnosiocu zahtjeva ili bilo kom od članova uprave podnosioca zahtjeva izrečena mjera sigurnosti ili zaštitna mjera zabrane obavljanja poziva, djelatnosti ili dužnosti u skladu sa zakonom,
- g) ukoliko podnosilac zahtjeva ne dokaže da ispunjava sve licencne kriterije i uvjete za koje DERK smatra da su neophodni za provođenje ciljeva Zakona,
- h) ukoliko prethodna evidencija o licencama podnosioca zahtjeva ne opravdava obnavljanje licence,
- i) ukoliko podnosilac zahtjeva nije dostavio DERK-u tražene podatke koji se odnose na prethodno izdatu licencu, u slučaju produženja licence,
- j) ukoliko podnosilac zahtjeva nije platio naknadu za podnošenje zahtjeva ili regulatornu naknadu DERK-a za prethodno izdatu licencu, i
- k) ukoliko je nad podnosiocem zahtjeva pokrenut postupak stečaja ili likvidacije.

VI FORMA I SADRŽAJ LICENCE

Član 35.

(Forma licence)

- (1) Licenca se izdaje u formi definiranoj od DERK-a.
- (2) Sastavni dio licence su uvjeti za korištenje licence.

Član 36.

(Sadržaj licence)

Licenca obavezno sadrži sljedeće informacije:

- a) djelatnost za koju se licenca izdaje,
- b) registracijski broj licence,
- c) datum izdavanja licence,
- d) naziv i adresa sjedišta vlasnika licence,
- e) porezni broj vlasnika licence, i
- f) vremenski period za koji se licenca izdaje.

Član 37.

(Sadržaj uvjeta za korištenje licence)

Uvjeti za korištenje licence sadrže, ali se ne ograničavaju na:

- a) zahtjev da vlasnik licence permanentno radi na ispunjavanju uvjeta predviđenih općim i posebnim kriterijima za izdavanje licence definiranih ovim pravilnikom,
- b) mogućnost otvaranja procesa redefiniranja licence tokom perioda njenog važenja, na zahtjev vlasnika licence ili na osnovu vlastite inicijative DERK-a kako bi se promijenili uvjeti licence zbog značajnijih promjena u zakonu ili činjeničnim okolnostima,
- c) obavezu stalnog dokazivanja finansijske sposobnosti i stabilnosti,
- d) odredbe o obavezi poštivanja propisa iz oblasti međunarodne trgovine, praćenja promjena međunarodnih tehničkih zahtjeva vezanih za trgovinu električnom energijom i usklađivanja poslovanja sa tim promjenama,
- e) odredbe o kvalitetu usluga,
- f) zahtjev za uspostavljanje kodeksa ponašanja i obavezu pridržavanja tog kodeksa,
- g) obaveze vezane za računovodstvene standarde,
- h) obavezu zaštite potrošača kojom se osigurava pravičan i ravnopravan tretman, visokokvalitetne usluge, konkurencija i sprječavanje antikonkurencijskih aktivnosti,
- i) obavezu poštivanja mrežnog kodeksa i tržišnih pravila,
- j) principe kontrole i nadzora obavljanja licencirane djelatnosti od DERK-a,
- k) obavezu redovnog dostavljanja podataka DERK-u, na način i u formi koju propiše DERK,
- l) obavezu dostavljanja podataka po posebnom zahtjevu DERK-a,
- m) obavezu pružanja javne usluge kako bi se osiguralo kontinuirano snabdijevanje električnom energijom kupaca,
- n) obavezu izvještavanja DERK-a o sporovima koji se vode pred nadležnim sudovima u vezi s licenciranom djelatnošću,
- o) način rješavanja sporova, i
- p) bilo koji drugi uvjet ili zahtjev koji DERK smatra važnim, kako bi se ispunili ciljevi zakona i propisa DERK-a.

Član 38.

(Sadržaj uvjeta za korištenje licence specifičan za pojedine licence)

Licenca za prijenos električne energije i licenca za aktivnosti nezavisnog operatora sistema sadrže uvjete koji omogućavaju konkurentnim snabdjevačima električnom energijom pristup prijenosnom sistemu i osiguravaju ispunjavanje uvjeta iz zakona i propisa DERK-a.

Član 39.

(Posebni uvjeti za licencu za prijenos električne energije)

Pored sadržaja iz čl. 37. i 38. ovog pravilnika, uvjeti za licencu za prijenos električne energije sadrže, ali se ne ograničavaju na sljedeće:

- a) odredbe koje omogućavaju ravnopravan pristup elektroprijenosnoj mreži za sve snabdjevače električnom energijom koji imaju fizički pristup sistemu,
- b) obavezu poštivanja važećih tarifa,
- c) obavezu poštivanja odredbi tehničkih standarda, komercijalnog i mrežnog kodeksa,

- d) obavezu planiranja proširenja sistema (uključujući i interkonekcijske vodove) da bi se zadovoljile potrebe potrošača,
- e) obavezu poštivanja standarda kvaliteta za snabdijevanje električnom energijom, regulaciju napona i poboljšanje karakterističnih parametara kvaliteta usluga koje vlasnik licence pruža korisnicima sistema,
- f) tabelarni prikaz objekata vlasnika licence pomoću kojih obavlja licenciranu djelatnost,
- g) tabelarni prikaz objekata koji nisu u vlasništvu vlasnika licence, a koje koristi za obavljanje licencirane djelatnosti,
- h) ovlaštenje za obavljanje djelatnosti prijenosa električne energije i djelatnosti u vezi sa prijenosom električne energije na teritoriji BiH korištenjem objekata iz prethodnih tabelarnih prikaza,
- i) kriterije pod kojima vlasnik licence može obavljati djelatnosti prijenosa i djelatnosti u vezi sa prijenosom električne energije u susjednim elektroenergetskim mrežama,
- j) zabranu obavljanja djelatnosti proizvodnje, isporuke, trgovine ili distribucije električne energije, ili bilo koje djelatnosti koje su van djelokruga prijenosa ili van djelokruga djelatnosti u vezi sa prijenosom električne energije, bez izričitog odobrenja DERK-a, u skladu sa Zakonom o osnivanju Elektroprijenosa,
- k) obavezu da vlasnik licence vodi posebne račune za djelatnost prijenosa od drugih djelatnosti na način i u obimu specificiranim u uvjetima,
- l) obavezu da vlasnik licence vrši izmjene u mreži vodeći računa da te izmjene ne utječu na kompatibilnost mreže sa proizvođačima, distributivnim i susjednim mrežama, kao i postrojenjima u vlasništvu trećih lica, na način da ugrožava opću sigurnost i sigurnost snabdijevanja,
- m) obavezu vlasnika licence da u skladu sa mrežnim kodeksom rukovodi, održava (uključujući popravke i zamjene ako je potrebno) i štiti svoju mrežu kako bi osigurao adekvatan, ekonomičan, pouzdan i siguran prienos električne energije,
- n) obavezu da usklađuje planiranje razvoja svoje mreže sa drugim mrežama i susjednim sistemima,
- o) obavezu da se postrojenja i vodovi projektiraju, grade i koriste tako da efekat njihovog korištenja neće ugroziti zdravlje stanovništva odnosno područja, i koji će u najmanjoj mogućoj mjeri promijeniti prirodno okruženje i vrijednost pejzaža,
- p) obavezu poštivanja pravila ili standarda odobrenih od DERK-a koji se odnose na zonu sigurnosti,
- r) obavezu da vodi odgovarajuće knjigovodstvo u skladu sa specificiranim principima, i
- s) odredbe koje zabranjuju napuštanje ili izmjenu licencirane aktivnosti ili bilo kojeg prijenosnog sredstva bez prethodnog odobrenja DERK-a.

Član 40.

(Posebni uvjeti za licencu za aktivnosti nezavisnog operatora sistema)

Pored sadržaja iz čl. 37. i 38. ovog pravilnika, posebni uvjeti za licencu za aktivnosti nezavisnog operatora sistema sadrže, ali se ne ograničavaju na sljedeće uvjete:

- a) odredbe koje omogućavaju ravnopravan pristup elektroprijenosnoj mreži za sve snabdijevače električnom energijom koji imaju mogućnost pristupa sistemu,
- b) obavezu poštivanja važećih tarifa,

- c) obavezu poštivanja odredbi tehničkih standarda, komercijalnog i mrežnog kodeksa,
- d) obavezu planiranja proširenja sistema (uključujući i interkonekcijske vodove) da bi se zadovoljile potrebe potrošača,
- e) standarde kvaliteta za snabdijevanje električnom energijom, održavanje frekvencije i regulaciju napona i poboljšanje karakterističnih parametara kvaliteta usluga koje vlasnik licence pruža korisnicima sistema,
- f) ovlaštenje za obavljanje djelatnosti nezavisnog operatora sistema za prijenosni sistem u BiH,
- g) zabranu obavljanja djelatnosti proizvodnje, snabdijevanja, trgovine ili distribucije električne energije, ili bilo koje druge aktivnosti koja nije odobrena Zakonom o osnivanju NOS-a,
- h) način obavljanja aktivnosti upravljanja sistemom prijenosa u svrhu osiguranja pouzdanosti,
- i) način upravljanja sredstvima i uređajima u glavnom kontrolnom centru,
- j) način upravljanja balansnim tržištem,
- k) način pružanja sistemskih usluga i osiguranja pomoćnih usluga,
- l) obavezu razvoja i primjene standarda pouzdanosti,
- m) obavezu razvoja i upravljanja pravilima koja reguliraju korištenje prijenosnog sistema,
- n) obavezu razvoja i provođenja tržišnih pravila koja rukovode odredbama u vezi sa sistemskim i pomoćnim uslugama nad prijenosnim sistemom,
- o) obavezu da svoju djelatnost obavlja u najboljem interesu svih strana u elektroenergetskom sistemu, i
- p) obavezu da se konzultira sa svim licenciranim proizvođačima i mrežnim operatorima kada uspostavlja ili mijenja operativne protokole i način dispečiranja ili odredbe o sigurnosti sistema.

Član 41.

(Posebni uvjeti za licencu za međunarodnu trgovinu električnom energijom)

Pored sadržaja iz člana 37. ovog pravilnika, posebni uvjeti za licencu za međunarodnu trgovinu sadrže, ali se ne ograničavaju na sljedeće uvjete:

- a) ovlaštenje za obavljanje međunarodne trgovine električnom energijom sa opisom transakcija koje je dozvoljeno vršiti,
- b) obavezu poštivanja tržišnih pravila, komercijalnog i mrežnog kodeksa,
- c) odredbe koje definiraju odnose i obaveze prema NOS-u i Kompaniji za prijenos električne energije uključujući, ali ne ograničavajući se na dostavljanje podataka, dokumenata i drugih informacija,
- d) odredbe koje zahtijevaju periodično nadgledanje ili druge informacije po pitanju djelatnosti vlasnika licence u drugim jurisdikcijama,
- e) odredbe o zabrani zloupotrebe tržišne moći, i
- f) način osiguranja garancija za sve transakcije koje obavlja.

Član 42.

(Posebni uvjeti za licencu za trgovinu i snabdijevanje električnom energijom na teritoriji BiH)

Pored sadržaja iz člana 37. ovog pravilnika, posebni uvjeti za licencu za trgovinu i snabdijevanje električnom energijom na teritoriji BiH sadrže, ali se ne ograničavaju na sljedeće uvjete:

- a) uvjete kreirane za omogućavanje finansijskog integriteta i stabilnosti vlasnika licence,
- b) uvjete koji definiraju potrebu rezervnog snabdjevača kao i mogućnost da vlasnik licence, u skladu sa odlukama DERK-a, postane rezervni opskrbljivač,
- c) uvjete kojima se definira način prestanka snabdijevanja,
- d) uvjete koji osiguravaju da su usluge fakturiranja potrošnje električne energije kupcima pružene na nediskriminirajući i transparentan način, i
- e) uvjete kreirane kako bi se omogućila usaglašenost sa tržišnim pravilima.

Član 43.

(Posebni uvjeti za licencu za distribuciju električne energije)

Pored sadržaja iz člana 37. ovog pravilnika, posebni uvjeti za licencu za distribuciju električne energije sadrže, ali se ne ograničavaju na sljedeće uvjete:

- a) uvjete kojima se definira teritorija na kojoj se obavlja licencirana djelatnost,
- b) uvjete kreirane kako bi se osigurala finansijska sposobnost i stabilnost vlasnika licence,
- c) uvjete kreirane za osiguranje transparentne i odgovarajuće računovodstvene metode kako bi se omogućila efikasna regulacija tarifa,
- d) uvjete koji propisuju obavezu pružanja javne usluge,
- e) uvjete kojima se osigurava transparentnost informacija o korištenju distributivne mreže,
- f) uvjete kojima se osigurava nediskriminirajući pristup treće strane distributivnoj mreži,
- g) uvjete kojima se definiraju način i propisi neophodni za priključenje na distributivnu mrežu,
- h) uvjete kojima se osigurava jasno i transparentno obavještanje kupaca o troškovima priključenja na distributivnu mrežu,
- i) uvjete kojima se definira posjedovanje odgovarajućih mjernih uređaja za praćenje potrošnje i kvaliteta isporuke električne energije,
- j) uvjete kojima se zahtijeva puno poštivanje svih drugih zakona i pravila, uključujući, ali ne ograničavajući se na tarifne zahtjeve DERK-a i drugih nadležnih tijela,
- k) uvjete koji zabranjuju napuštanje ili izmjenu licencirane djelatnosti ili bilo kojeg distributivnog sredstva bez prethodnog odobrenja DERK-a, i
- l) uvjet da je vlasnik licence obavezan ostvariti pravo vlasništva ili drugi pravni osnov za korištenje elektroenergetskih postrojenja, objekata i zemljišta putem koga i na komu se obavlja distributivna djelatnost sa zadatim vremenskim rokom.

Član 44.

(Posebni uvjeti za licencu za proizvodnju električne energije)

Pored sadržaja iz člana 37. ovog pravilnika, posebni uvjeti za licencu za proizvodnju električne energije sadrže, ali se ne ograničavaju na sljedeće uvjete:

- a) uvjete određene za osiguranje finansijske sposobnosti i stabilnosti vlasnika licence za proizvodnju,
- b) uvjete kojima se definira obim eventualnog pružanja javne usluge,
- c) uvjete koji od vlasnika licence zahtijevaju pružanje pomoćnih usluga u skladu sa raspoloživim tehničkim mogućnostima i tehničkim i komercijalnim pravilima na tržištu električne energije,
- d) uvjete da posjeduje mjerne uređaje koji omogućavaju upravljanje proizvodnjom i mjerenje količine i kvaliteta električne energije koja se predaje u sistem,
- e) uvjete da vlasnik licence osigurava registriranje i zadovoljavajuće analiziranje sigurnosti i strukturalnog integriteta parametara visokih brana i ostalih građevinskih objekata, uključujući i seizmičke pojave,
- f) uvjete da vlasnik licence osigurava neophodna mjerenja o utjecaju na okolinu u skladu sa zakonima o zaštiti okoline,
- g) uvjete koji zahtijevaju od vlasnika licence obavljanje periodične detaljne procjene statusa sigurnosti i pouzdanosti postrojenja, kao i zaštite okoline, i
- h) uvjete koji obavezuju vlasnika licence na zatvaranje i/ili uklanjanje svih objekata i postrojenja i vraćanje zemljišta u prvobitno stanje, ukoliko licenca nije obnovljena ili prenesena.

VII DOZVOLA ZA IZGRADNJU OBJEKATA ZA PROIZVODNJU ELEKTRIČNE ENERGIJE

Član 45.

(Potrebni dokumenti)

Zahtjev za izdavanje dozvole za izgradnju elektroenergetskog objekta se podnosi na obrascu propisanom od DERK-a, a uz zahtjev se obavezno prilaže sljedeće:

- a) rješenje o upisu u sudski ili drugi odgovarajući registar,
- b) potvrda ili uvjerenje o poreznoj registraciji,
- c) statut ili osnivački akt,
- d) izjava podnosioca zahtjeva o strukturi izvora finansiranja koja je usklađena sa studijom izvodljivosti ili potvrde poslovnih banaka da podnosilac zahtjeva raspolaze dovoljnim vlastitim sredstvima i/ili da ima pristup kreditnim sredstvima neophodnim za izgradnju objekta,
- e) uvjerenje nadležnog organa da podnosiocu zahtjeva ili njegovom zakonskom zastupniku ne traje izrečena mjera sigurnosti ili zaštitna mjera zabrane obavljanja poziva, djelatnosti ili dužnosti,
- f) studija izvodljivosti izgradnje objekta i idejni ili glavni projekat ukoliko je izrađen,
- g) odobrena studija o utjecaju na životnu sredinu, kako je to propisano zakonom i drugim propisima,

- h) ekološka dozvola kako je zakonom ili drugim propisom predviđena za vrstu objekta za koji se podnosi zahtjev za izdavanje dozvole,
- i) vodopravne akte, kako je zakonom ili drugim propisom predviđeno za vrstu objekta za koji se podnosi zahtjev za izdavanje dozvole,
- j) elektroenergetska saglasnost za priključenje na distributivnu mrežu, i/ili elaborat tehničkog rješenja priključka i uvjete za priključak na prijenosnu mrežu,
- k) lokacijski uvjeti,
- l) ugovor ili drugi dokaz o dodjeli koncesije, ako se objekat gradi i po ovom principu,
- m) izjava/potvrda podnosioca zahtjeva o prethodno izgrađenim ili rekonstruiranim sličnim elektroenergetskim objektima za proizvodnju električne energije,
- n) izjava/potvrda podnosioca zahtjeva o podnesenim zahtjevima, te dobijenim dozvolama od drugih regulatornih komisija, i
- o) dokaz o uplati naknade za podnošenje zahtjeva.

Član 46.

(Kriteriji za izdavanje dozvole za izgradnju)

- (1) Pravno ili fizičko lice koje namjerava započeti izgradnju novog proizvodnog elektroenergetskog objekta ili značajnu rekonstrukciju postojećeg proizvodnog elektroenergetskog objekta na teritoriji Brčko Distrikta BiH ne može započeti izgradnju ili značajnu rekonstrukciju bez prethodno pribavljene dozvole za izgradnju izdate od DERK-a.
- (2) Dozvola za izgradnju izdaje se podnosiocu zahtjeva koji dokaže:
 - a) da je elektroenergetski objekat planiran, odnosno projektiran na način koji ne ugrožava sigurnost funkcioniranja elektroenergetskog sistema na koji se priključuje,
 - b) da je elektroenergetski objekat planiran, odnosno projektiran na način koji ne ugrožava opću sigurnost i sigurnost funkcioniranja pripadajućih instalacija i opreme,
 - c) da za elektroenergetski objekat posjeduje vodopravne akte ako su isti potrebni prema propisima koji reguliraju ovu oblast,
 - d) da za elektroenergetski objekat posjeduje ekološku dozvolu u skladu sa propisima koji reguliraju ovu oblast,
 - e) da za izgradnju elektroenergetskog objekta posjeduje ugovor o koncesiji, ukoliko se objekat gradi po osnovu koncesije,
 - f) da ispunjava uvjete sigurnosti rada elektroenergetskog objekta po zdravlje ljudi,
 - g) da nema ograničenja u pogledu korištenja primarnog izvora energije za proizvodnju električne energije,
 - h) da nema ograničenja u pogledu određivanja lokacije i korištenja zemljišta za izgradnju elektroenergetskog objekta,
 - i) da je elektroenergetski objekat planiran, odnosno projektiran na način koji osigurava zadovoljavajući nivo energetske efikasnosti, i

- j) da se na osnovu priloženih dokumenata može ocijeniti da posjeduje finansijsku stabilnost za poslovanje kojom se osigurava ispunjavanje uvjeta dozvole.

Član 47.

(Uvjeti dozvole za izgradnju)

Uvjeti dozvole za izgradnju elektroenergetskog objekta mogu sadržavati, ali se neće ograničiti na uvjete:

- a) kojima se zahtijeva permanentno ispunjavanje kriterija predviđenih članom 52. ovog pravilnika,
- b) u vezi sa transparentnim vođenjem računovodstvenih evidencija,
- c) kojima se zahtijeva puno poštovanje svih zakona i propisa,
- d) koji se odnose na obavezu korisnika dozvole da se prilikom izgradnje ili rekonstrukcije elektroenergetskih objekata pridržava plana isključenja električne energije pri čemu neće biti značajnije umanjena redovnost snabdijevanja električnom energijom,
- e) u vezi sa reguliranjem imovinsko-pravnih odnosa u pogledu izgradnje elektroenergetskog objekta,
- f) u pogledu osiguranja garancije na iznos potreban za demontiranje i/ili uklanjanje svih objekata i otpada koji je nastao pri gradnji i uređenje zemljišta u skladu sa zakonom u slučaju eventualnog prekida radova i odustajanja od izgradnje ili ukoliko se izgrađeni objekat koristi za druge namjene,
- g) pod kojima se korisnik dozvole, u interesu Brčko Distrikta BiH, može osloboditi obaveze demontaže i uklanjanja objekta iz tačke f) ovog člana,
- h) kojima se uvodi obaveza dostavljanja DERK-u finansijskih, tehničkih i drugih podataka o izgradnji elektroenergetskog objekta u skladu sa zahtjevima DERK-a,
- i) kojima se korisnik dozvole obavezuje da se pridržava zakona, važećih tehničkih propisa i standarda za izgradnju i rekonstrukciju elektroenergetskih objekata, kao i trenutne regulative na području izgradnje ili rekonstrukcije objekata,
- j) kojima se korisnik dozvole obavezuje da se tokom izgradnje objekta pridržava principa zaštite životne sredine definiranih uvjetima ekološke dozvole i drugim propisima,
- k) kojima se korisnik dozvole obavezuje da ostvari energetska efikasnost korištenja primarnih izvora energije, kako je definirano planskom, odnosno projektnom dokumentacijom,
- l) kojima se osigurava tajnost podataka koji su označeni kao povjerljivi od subjekta koji ih je dostavio, kao i drugih podataka čija je obaveza čuvanja utvrđena posebnim propisima, i
- m) bilo koji drugi uvjet koji je potreban kako bi se ispunili ciljevi zakona ili propisa DERK-a.

VIII PROMJENE STATUSA LICENCE

Član 48.

(Obnova licence)

- (1) Ukoliko namjerava da nastavi obavljati licenciranu djelatnost, vlasnik licence podnosi zahtjev za obnovu licence najkasnije 120 dana prije isteka licence. Obnavljanje licence

se vrši na isti način kao i dodjeljivanje licence.

- (2) Zahtjev za obnovu licence treba da sadrži sve dokumente propisane ovim pravilnikom za dodjelu licence. Izuzetno, za dokumente koji nisu mijenjani tokom važenja licence ili za dokumente koji su izmijenjeni i dostavljeni DERK-u tokom važenja licence, može se podnijeti izjava da nije bilo promjene dokumenta. Izjava treba da sadrži datum dostave dokumenta DERK-u.
- (3) Ukoliko je ispunjen uvjet iz stava (1) ovog člana DERK donosi odluku o obnovi licence u skladu sa odredbama ovog pravilnika i dostavlja je podnosiocu zahtjeva najkasnije 30 dana prije isteka prethodno izdate licence.
- (4) DERK može naložiti vlasniku licence za obavljanje djelatnosti prijenosa električne energije, nezavisnog operatora sistema ili distribucije da, uprkos isticanju roka važnosti licence, nastavi pružati usluge na privremenom osnovu, ako se za to pojavi potreba.

Član 49.

(Izmjena licence)

- (1) DERK može otvoriti proces izmjene licence po zahtjevu vlasnika licence ili na svoju inicijativu, zbog potreba uzrokovanih jasnom i nepredvidivom promjenom okolnosti.
- (2) Vlasnik licence podnosi pisani zahtjev za izmjenu licence uz navođenje dijela licence koji želi da mijenja i novog predloženog teksta sa obrazloženjem i potkrepljujući svoj zahtjev dokazima.
- (3) U slučaju da DERK inicira izmjenu licence, vlasnik licence se obavještava pisanim putem o promjeni okolnosti, razlozima za iniciranje izmjena i samim izmjenama licence. U obavijesti se navodi i pregled aktivnosti DERK-a u procesu izmjene licence.
- (4) Postupak za izmjenu licence vodi se na isti način kao i postupak za izdavanje licence.
- (5) Jasna i nepredvidiva promjena okolnosti iz stava (1) ovog člana uključuje, ali se ne ograničava na sljedeće:
 - a) prestrukturiranje elektroenergetskog sektora,
 - b) promjena pozicije i uloge vlasnika licence u regionalnim i međunarodnim okvirima,
 - c) velike promjene u pravnom okviru, sudskim odlukama, događajima ili ugovorima koje bitno utječu na licencirane djelatnosti,
 - d) promjene uvjeta koje imaju veliki utjecaj na obavljanje licencirane djelatnosti,
 - e) finansijska nesolventnost ili stečaj,
 - f) statusne promjene vlasnika licence ili promjene bitnih podataka u odgovarajućem registru (spajanje, razdvajanje, privatizacija),
 - g) promjene koje utječu da ispunjavanje uvjeta iz licence postane nemoguće,
 - h) višestruka neusklađenost sa postojećim uvjetima licence,
 - i) višestruke žalbe korisnika usluga vlasnika licence,
 - j) izmjena propisa DERK-a, i
 - k) zaštita javnog interesa.
- (6) U slučaju da su izmjene licence takvog obima da se bitno mijenja sadržaj licence, DERK obavještava korisnika licence da je potrebno da u postupku otvaranja procesa

izmjene licence podnese novi zahtjev za dodjelu licence.

- (7) Promjenom licence neće se smatrati promjena naziva, sjedišta ili adrese vlasnika licence u kojem slučaju će se odlukom DERK-a vlasniku licence omogućiti da nastavi korištenje licence pod novim nazivom, odnosno u novom sjedištu ili adresi.
- (8) Promjenom licence neće se smatrati ni promjene broja i strukture objekata koje vlasnik licence koristi u funkciji obavljanja licencirane djelatnosti, a koje se zaključkom DERK-a o stanju na dan 31. decembra svake godine samo konstatiruju.

Član 50.

(Promjena dozvole za izgradnju)

- (1) Promjena uvjeta dozvole za izgradnju elektroenergetskog objekta može se odobriti na osnovu zahtjeva korisnika dozvole ili na inicijativu DERK-a.
- (2) Zahtjev korisnika za promjenu uvjeta dozvole za izgradnju podnosi se u skladu sa ovim pravilnikom po istoj proceduri po kojoj se podnosi i zahtjev za izdavanje dozvole za izgradnju elektroenergetskih objekata.
- (3) Inicijativa DERK-a za promjenu uvjeta dozvole donosi se u formi zaključka o pokretanju inicijative na redovnoj sjednici DERK-a.
- (4) Promjena uvjeta dozvole može se odobriti samo u posebnim slučajevima u cilju općeg interesa.
- (5) Kod donošenja konačne odluke o promjeni uvjeta dozvole za izgradnju uzima se u obzir trošak koji se može pojaviti za korisnika dozvole zbog promjene uvjeta, kao i opće koristi i štete koje su rezultat te promjene.

Član 51.

(Suspenzija i ukidanje licence)

- (1) DERK može izvršiti suspenziju licence na određen vremenski period, ili trajno ukinuti licencu u sljedećim slučajevima:
 - a) ako vlasnik licence to zatraži, ili
 - b) ako se nakon rasprave, koja se odvija u skladu sa ovim pravilnikom i Poslovnikom o radu DERK-a, utvrdi:
 - 1) da se vlasnik licence ne pridržava uvjeta iz licence,
 - 2) da vlasnik licence ne dostavlja podatke i informacije tražene od DERK-a, NOS-a, Kompanije za prijenos električne energije ili Ministarstva vanjske trgovine i ekonomskih odnosa BiH tokom trajanja licence,
 - 3) da vlasnik licence namjerno dostavlja netačne podatke i informacije DERK-u, NOS-u, Kompaniji za prijenos električne energije ili Ministarstvu vanjske trgovine i ekonomskih odnosa BiH,
 - 4) da vlasnik licence ne omogućava direktan pristup opremi, dokumentima ili drugim objektima koji su u vlasništvu ili su kontrolirani od vlasnika licence, ili se vlasnik licence ne pridržava uvjeta nadgledanja,
 - 5) da je vlasnik licence neovlašteno prodao, dodijelio ili prenio pravo obavljanja licencirane djelatnosti trećoj strani bez prethodne saglasnosti DERK-a, i

- 6) da vlasnik licence ne plaća regulatornu naknadu ili ne dostavi zatraženu bankarsku garanciju u roku određenom od DERK-a.
- (2) DERK inicira postupak suspenzije licence dostavljanjem obavijesti vlasniku licence o pokretanju postupka sa pisanim obrazloženjem o razlozima pokretanja postupka.
- (3) Postupak za suspenziju licence vodi se na isti način kao i postupak za dodjeljivanje licence.
- (4) Ukoliko tokom postupka vlasnik licence ispuni zahtijevane uvjete, DERK može obustaviti postupak suspenzije.
- (5) Ukoliko DERK suspendira licencu na određeni vremenski period, pa vlasnik licence ispuni zahtijevane uvjete tokom trajanja suspenzije DERK može ukinuti suspenziju, a ako vlasnik licence ne ispoštuje zahtjeve DERK-a zbog kojih je izrečena suspenzija, DERK može ukinuti licencu u roku od šest mjeseci od dana donošenja odluke o suspenziji licence.
- (6) Ukidanjem licence vlasnik licence gubi pravo da ponovo DERK-u podnese zahtjev za dodjelu bilo koje vrste licence u narednih pet godina.
- (7) DERK može izvršiti i suspenziju licence u slučaju naročitih kršenja odredbi uvjeta za korištenje licence uključujući i kršenja odredbi iz stava (1) tačka b) alineja 6) ovog člana.
- (8) Suspenziju u slučaju iz stava (1) tačka a) i stava (7) ovog člana DERK vrši bez obavljanja javne rasprave.
- (9) Suspenziju po zahtjevu vlasnika može se izvršiti samo jednom u toku važenja licence i to na period od šest do 12 mjeseci.
- (10) Za vrijeme dok je licenca suspendirana vlasnik licence nema obavezu plaćanja regulatorne naknade.

Član 52.

(Prijenos ovlaštenja)

Nakon suspenzije ili ukidanja licence za prijenos električne energije, djelatnost nezavisnog operatora sistema, distribuciju ili snabdijevanje u okviru javne usluge, DERK može ovlastiti drugog vlasnika licence da obavlja djelatnost definiranu suspendiranom ili ukinutom licencom, uz korištenje objekata, instalacija i mreže prethodnog vlasnika licence.

Član 53.

(Prijenos licence)

- (1) Ako vlasnik licence želi prodati, dodijeliti, prenijeti, iznajmiti ili na drugi način izvršiti prijenos svoje licence, djelatnosti koje su predmet licence ili sredstva iz licence, mora za takav prijenos dobiti odobrenje DERK-a. Neovlaštena prodaja, dodjela ili transfer licencirane djelatnosti trećoj strani bez prethodnog odobrenja DERK-a će biti razlog DERK-u za suspenziju postojeće licence.
- (2) Ukoliko je postupak prijena licence odobren, vlasnik licence je dužan da nastavi sa izvršavanjem svojih obaveza u skladu sa uvjetima licence dok se postupak prijena ne okonča.
- (3) Novi vlasnik licence mora da ima odobrenje za prijenos licence izdato od DERK-a prije početka obavljanja licencirane djelatnosti.

- (4) Postupak prijenosa licence se vodi na isti način kao i postupak izdavanja licence. DERK će odlučiti da li je lice kome se licenca prenosi sposobno da zadovolji uvjete licence.
- (5) Period važenja, kao i sadržaj uvjeta licence, će ostati nepromijenjeni.

IX REGISTAR LICENCI

Član 54. ***(Registar licenci)***

- (1) DERK ima obavezu da vodi registar licenci.
- (2) U registar se unose sva dokumenta u vezi dodjele licence.
- (3) Dokumenti koji se moraju registrirati su:
 - a) zahtjev za izdavanje licence,
 - b) prilozi uz zahtjev,
 - c) zaključak o utvrđivanju kompletnosti zahtjeva,
 - d) dokumenti koji se odnose na javne rasprave,
 - e) odluka o izdavanju ili odbijanju licence,
 - f) licenca sa uvjetima za korištenje,
 - g) odluka o izmjenama i dopunama, suspenziji ili ukidanju licence,
 - h) odluka o prijenosu licence na drugo lice,
 - i) odluka iz stava (7) člana 49. ovog pravilnika, i
 - j) odluka o pružanju usluga na privremenoj osnovi iz člana 46. ovog pravilnika.
- (4) DERK vodi i sažetak registra u elektronskoj formi, koji se sastoji od sljedećih podataka:
 - a) registracijski broj licence,
 - b) datum zavođenja u registar licenci,
 - c) naziv vlasnika licence,
 - d) mjesto i adresa vlasnika licence,
 - e) datum izdavanja licence,
 - f) datum isteka licence, i
 - g) datum donošenja odluke o izmjenama, dopunama, suspenziji, ukidanju ili prijenosu licence.
- (5) Sažetak registra u elektronskoj formi iz stava (4) ovog člana se objavljuje na internet stranici DERK-a.
- (6) Registracijski broj se dodjeljuje svakoj licenci izdatoj od DERK-a i sastoji se od:
 - a) rednog broja pod kojim je zavedena u knjigu protokola DERK-a,
 - b) broja dokumenta prema klasifikaciji, i
 - c) godine.

Član 55.

(Registar podnesenih zahtjeva)

- (1) DERK sačinjava listu – registar svih podnesenih zahtjeva za dodjelu licence, koji su u postupku, a po kojima nije odlučeno, sa procjenom potrebnog perioda za odlučivanje po svakom pojedinačnom zahtjevu. Lista omogućava DERK-u efikasniji postupak izdavanja licence i pruža informaciju zainteresiranim licima.
- (2) Lista podnesenih zahtjeva se objavljuje na internet stranici DERK-a.

Član 56.

(Sadržaj objave u službenim glasilima)

- (1) Dispozitiv odluke iz domena ovog pravilnika objavljuje se u “Službenom glasniku BiH”, službenim glasilima entiteta i u “Službenom glasniku Brčko Distrikta BiH”.
- (2) Integralni tekst odluke iz stava (1) ovog člana objavljuje se na internet stranici DERK-a.

X REGISTAR TRGOVACA ELEKTRIČNOM ENERGIJOM

Član 57.

(Svrha registra trgovaca električnom energijom)

U cilju praćenja jedinstvenog tržišta električne energije na području Bosne i Hercegovine DERK vodi registar svih licenciranih trgovaca električnom energijom sa licencom izdatom od regulatornih organa u BiH (DERK, RERS, FERK) kojima se omogućuje trgovina električnom energijom.

Član 58.

(Sadržaj registra trgovaca električnom energijom)

- (1) Registar trgovaca električnom energijom vodi se na osnovu podataka o izdatim licencama za trgovinu DERK-a, te dostavljenih podataka o izdatim licencama za obavljanje djelatnosti trgovine i snabdijevanja električnom energijom izdatim od RERS-a ili dozvola za snabdijevanje drugog reda izdatih od FERK-a.
- (2) U registru trgovaca električnom energijom vode se sljedeći podaci:
 - a) naziv vlasnika licence,
 - b) adresa,
 - c) datum i period važenja licence,
 - d) registracijski broj licence, i
 - e) nadležni regulator koji je izdao licencu.
- (3) Registar trgovaca električnom energijom vodi se u elektronskoj formi i objavljuje se na internet stranici DERK-a.

Član 59.

(Izveštavanje)

Registrirani trgovci dostavljaju mjesečne izvještaje o realizaciji trgovine električnom energijom u formi propisanoj od DERK-a.

XI REGULATORNI NADZOR

Član 60.

(Uvjeti regulatornog nadzora)

- (1) DERK vrši regulatorni nadzor obavljanja licencirane djelatnosti.
- (2) Vlasnik licence mora dostavljati DERK-u izvještaje navedene u uvjetima licence ili po zahtjevu DERK-a tokom perioda važenja licence.
- (3) DERK vrši najavljene i nenajavljene posjete vlasnicima licenci u funkciji regulatornog nadzora i vrši regulatorni pregled objekata i dokumenata vezanih za licenciranu djelatnost.
- (4) DERK nadgleda sve aspekte usklađenosti vlasnika licence sa uvjetima licence, kao i svim odredbama relevantnih zakona i propisa DERK-a.
- (5) DERK može pokrenuti hitni postupak u cilju reagiranja na sumnju o povrjedi obaveza iz licence koju je izdao, na vlastitu inicijativu ili kao odgovor na zahtjev bilo kojeg lica.
- (6) DERK obavještava RERS i FERK o svim uočenim nepravilnostima i problemima u vezi sa djelatnošću trgovaca kojima su dozvole izdali RERS i FERK.

Član 61.

(Sankcije)

- (1) Ukoliko se vlasnik licence ne pridržava uvjeta iz licence, dozvole ili Zakona, primjenjuju se kaznene odredbe predviđene zakonom.
- (2) DERK može vlasniku licence dostaviti obavijest o povrjedi i pozvati ga na administrativno poravnanje zbog povrjede dozvole od vlasnika iste, prije nego što se primijene kaznene odredbe.
- (3) Prije primjene ove mjere, u slučajevima kada to okolnosti dozvoljavaju, DERK u pisanoj formi opominje vlasnika licence i određuje rokove za otklanjanje nedostataka.
- (4) DERK prilikom sankcioniranja može primijeniti i odredbe člana 51. ovog pravilnika, tj. suspendirati ili ukinuti licencu.

XII PRAVNI LIJEK

Član 62.

(Pravni lijek)

- (1) Odluke DERK-a o izdavanju licence, odbacivanju ili odbijanju zahtjeva za izdavanje licence, obnovi, izmjeni, prijenosu, suspenziji ili ukidanju licence su konačne administrativne odluke.
- (2) Protiv odluka iz stava (1) ovog člana moguće je podnijeti tužbu Sudu Bosne i Hercegovine u roku od 60 dana od dana dostave odluke.
- (3) Prethodne preliminarne proceduralne odluke DERK-a, voditelja postupka ili DERK-ovog osoblja se ne smatraju konačnim odlukama.

XIII PRIJELAZNE I ZAVRŠNE ODREDBE

Član 63.

(Prestanak važenja ranijih pravila)

Danom stupanja na snagu ovog pravilnika, prestaju da važe Pravilnik o licencama ("Službeni glasnik BiH", broj 38/05), Pravilnik o izdavanju privremenih licenci za obavljanje djelatnosti distribucije i snabdijevanja električnom energijom u Brčko Distriktu BiH ("Službeni glasnik BiH", broj 5/11) i Odluka o uspostavi pojednostavljene procedure izdavanja licence za međunarodnu trgovinu za podnosioca zahtjeva u statusu kvalificiranog kupca ("Službeni glasnik BiH", br. 75/06 i 101/08).

Član 64.

(Prijelazna odredba)

- (1) Postupak izdavanja licence po zahtjevima koji su zaprimljeni prije stupanja na snagu ovog pravilnika okončat će se u skladu sa ranije važećim pravilima.
- (2) Licence za međunarodnu trgovinu električnom energijom za vlastite potrebe izdate u skladu sa ranije važećim pravilima važe do 31. decembra 2016. godine."

Član 65.

(Tumačenje i drugi akti DERK-a)

- (1) Tumačenje odredbi ovog pravilnika daje DERK.
- (2) Ukoliko neko pitanje nije sadržano u ovom pravilniku, DERK će odlučiti o njegovom rješavanju u svakom konkretnom slučaju.

Član 66.

(Objavlivanje Pravilnika)

Prečišćeni tekst ovog pravilnika objavit će se u "Službenom glasniku BiH".

Broj: 05-02-2-236-1/16

12. augusta 2016. godine

Tuzla

S e k r e t a r

Slobodanka Milašinović